

新 中 學 文 庫
張 文 襄 公 年 譜

許 同 莘 編

商 務 印 書 館 發 行

許同莘編

張文襄公年譜

商務印書館印行

中華民國三十三年五月重慶初版
中華民國三十五年六月上海再版

(91004 滬報紙)

張文襄公年譜一冊

定價國幣伍元伍角

印刷地點外另加運費

編著者 許同莘

發行人 朱經農
上海河南中路

印刷所 商務印書館
商務印刷廠

發行所 商務印書館
各地書館

凡例

一、此書網羅事實、兼備國史取材、所採自遺稿外、凡檔冊邸鈔官書方志及同時諸公奏議詩文日記之屬、觀覽所及、咸有採摭、其得之口述者、必確鑿可信、然後著之。

一、章奏函電已入全集者、祇舉大綱。全集所遺、則節存切要者、故注有詳略之別。

一、未刊之稿、倍全集而有贏、此書紀載凡不見本集者、大率取資於是。

一、公學術爲一代所宗。論學之言不宜缺略、而年譜以月日爲先後。條分件繁、難於適合、茲附於每卷之後。詩文無月日可考者、附每年之後、年不可考者從闕。

一、遺聞軼事可見性情風格者、標舉一二。私家所記失實者正之。

一、官書錄疆吏奏摺、其月日據遞進之日書之。此書以發摺之日爲據。其施行在先奏聞在後者、以行文之日爲據。故間與官書互異。

一、書中於並時之人、書名書字書別號書邑書本職書銜書諡、視文勢語氣爲之、未能畫一、職非史官、不當用國史之例。閱者諒之。

一、前人年譜之式。或旁行斜上、或聯屬成文、或提綱附注、本無定體、惟事實多則眉目宜醒、茲參用雷塘庵弟子記及顧閔年譜例、大字提綱、小字分注、間有考訂、亦附注中、正文不及詳者、則每卷之後、各爲識語。

一、此書草創於辛酉以前、以蒐採基難、屢作屢輟。及脫稿、則公夙昔交游與夫門生故吏、已多物化、猶幸毀庵陳公竹君趙先生皆享大年、得以就正。陳公并審定義例、閱定前三卷文字。趙先生多所指示而不欲著姓名、其詩文紀事、則得之雲門樊先生爲多。早歲及晚年事實。則得之公子仁侃公孫厚琬從子樞族孫宗芳

爲多。此外參閱諸君、不及徧舉、并識於此。

此稿付印之時、因小註雙行、排字不便、暫照正文字體而以括弧別之。并記。

序

汪梅村之在胡文忠幕府也、就所見聞爲撫鄂記。閻文介得其稿而藏之。張文襄督湖廣、議刊行。文介以書至、則事迹具焉。文襄復曰、書體例不畫一、敘次不盡合法、注多支蔓語、何疏率若此。宜刪節改正、始可付刊。梅村、績學人也、記翔實若無可議、而文襄病之、著書固若是其難也。文襄之世、又非文忠時比。文襄身繫朝局疆寄之重者四十年。值瀛海大通、學術政事、新舊遞變。文襄困心衡慮、支柱其間。其不見於文字者、惟當日與文襄上下議論及朝夕於左右者知之。同莘生晚、從文襄之日少。文襄既歿、輯遺書、始得徧觀所爲文字。而竝時人物、後先物故。幸而得見其人、又皆憂傷憔悴、言之而不能盡記。於此而欲述聞見爲一書、其疏率殆什百於梅村。然及今不爲、則他日雖有人焉、欲爲之而愈不易。而數十年間朝章國故、且失墜不可考。夫士生乎後世、敘次古人文章事業、考其年月、著其本末、以抒景慕之思。雖未必果合於古人、而論者有取焉。況乎得見其人、粗悉其身世。而恍於著書之難、才之不克副、謾其責於來者。是便私圖、負知己、而非公義所宜出也。旣輯遺書而刊印之、遂及斯譜、自草創迄於寫定、歷十五年、爲卷十、其體例斟酌於前人之作而加詳焉。其失也繁而不殺、由繁而簡、以合於文襄所云一體例合敘次之法者、則後賢刪節改正之事也、許同莘謹記。

目錄

卷一.....一

始生至四十五歲

卷二.....二九

四十六歲至四十九歲

卷三.....四一

四十九歲至五十三歲

卷四.....六九

五十三歲至五十八歲

卷五.....八九

五十八歲至六十歲

卷六.....一〇三

六十歲至六十二歲

卷七.....一九

六十二歲至六十六歲

卷八……………一六五

六十六歲至六十八歲

卷九……………一八一

六十八歲至七十一歲

卷十……………二〇九

七十一歲至卒葬

張文襄公年譜

閩陳寶琛閱定

無錫許同莘謹編

卷一

公諱之洞、字孝達。一字鄉濤。又號密公。先世山西洪洞縣人。明永樂二年。遷山右民官歲輔。始祖本。自洪洞徙潯縣。本子立。立子端。官南直隸繁昌縣菰港巡檢。自潯縣徙南皮縣東門之印子頭。是爲東門張氏。端子淮。正德戊辰進士。河南按察使。以文章忠義有聲於時。淮七傳至山西孝義知縣乃曾。又徙畢家塘。顏所居曰孝義堂。是爲公高祖。曾祖怡熊、字叶占。浙江山陰知縣。兩世爲縣令、皆以廉惠聞。祖廷琛、字獻侯。貢生。四庫館謄錄。議敘福建漳浦東場鹽大使。題補古田知縣。乾隆季年。福建將軍魁倫興大獄。閩中官吏繫獄者。督撫滂臬道府十餘人。應縣以下七十五人。漳浦公以鹽場官署候官縣。又兼署近省一縣及省城首領佐貳各官。凡絀九家。因繫之官皆屬焉。所調護拯救者甚至。識者以爲有陰德。其後必昌。考鏐、字又甫。號春潭。徙居城南三里雙廟村。(今名雙妙村)。少孤。食貧力學。艱苦卓絕。舉嘉慶十八年鄉試。以大挑試令黔中。補安化知縣。署清平鎮遠威寧等州縣事。治行稱最。調貴筑。遷古州同知。署黎平遵義安順諸府事。尋擢知興義府。娶劉夫人。布政司經歷滄州劉廷式女。繼娶蔣夫人。嘉慶乙丑進士嘉定知府盧龍蔣策女。繼娶朱夫人。嘉慶甲戌進士四川邛州直隸州知州臨桂朱紹恩女。道光十七年丁酉八月初三日。朱夫人生公於興義府官舍。

道光二十年庚子公四歲

朱太夫人卒。〔太夫人善鼓琴。遺琴二。贈公自朱夫人卒後。不復娶。命側室魏氏撫字之。及公貴。魏氏以覃恩累封夫人。〕

道光二十一年辛丑公五歲

入塾。從何養源先生受讀〔問字義必索解乃止〕。

道光二十二年壬寅公六歲

六月。贈公丁母蘇太夫人憂。開知府缺。

道光二十四年甲辰公八歲

九月。贈公服闋。如貴州。仍知興義府。

道光二十五年乙巳公九歲

讀四書五經畢。〔籌鐙思索。每至夜分。倦則伏案而睡。醒復思。必得其解乃已。其後服官治文書。往往達旦。自言乃幼時好夜坐讀書故。〕

道光二十六年丙午公十歲

讀九經畢。學爲詩古文辭。〔贈公訓子。以儉約知禮爲宗。過庭授學。多乾嘉老輩緒言。黔中僻遠。難得書。謁俸購數十廚。置諸子學舍。令於日課外。聽以己意觀之。大率史部書近代說經之書及朱子書爲多。所親或諷曰。兒童豈能解此。贈公曰。姑令縱觀。不解無妨。浸灌既多。長大後自有解者。又教諸子曰。貧、

吾家風。汝當力學。」

道光二十七年丁未公十一歲

作詩文。工力日進。〔興義府教授敖君爲古風一篇。贈公命和。授筆立就。後在粵時敖君之子持先集刻本來謁。此詩兩見集中。公語左右云。贈公當時見詩而喜。酌酒飲之。并獎古硯一方。〕

道光二十八年戊申公十二歲

詩文爲塾師獎許。〔興義府署與試院鄰。試院。贈公所建也。樹石佳勝。有天香閣。盡見城東南山水。讀書其中。裏所作詩文爲一冊。曰天香閣十二齡草。贈公寄示兄□於任所。得復以斂才勿露爲勗。公終身誦之。其後焚少作略盡。按贈公之兄錯。字鐵夫。任縣教諭。此事公所自言。而未舉其名。故闕。〕

道光二十九年己酉公十三歲

從韓果靖公受業。〔韓公名超。字寓中。昌黎人。道光甲午副貢。以直隸州州判需次貴州。沉勇慷慨。胡文忠稱爲血性奇男子。贈公延致署中。命四子受業。未幾。韓公就文忠於黎平。公受業師前此有曾摺之張蔚齋貴西垣黃升三王可貞敖慕韓張肖巖趙斗山諸先生。後此有丁誦孫童雲遠袁燮堂洪次庚諸先生。曾先生。名敘笏。道光乙酉拔貢。張先生。名國華。副貢。貴先生。名貴乙。附生。黃先生。名政鈞。舉人。南雒州州同。王先生。名含章。道光甲辰舉人。普安縣訓導。敖先生。名國琦。道光丁未進士。陳留知縣。張先生。名元弼。嘉慶庚午舉人。趙先生。名拔才。嘉慶庚午舉人。丁先生。名嘉謀。武進人。道光戊戌進士。翰林院侍讀。童先生。名暈。道光癸巳進士。定番州知州。袁先生。名理。附生。洪先生。名調笙。號南陔。咸豐辛亥舉人。樂陵知縣。公自言得力於丁先生最多。袁先生。公之姑夫也。又嘗從胡文忠公問業。抱冰堂

弟子記。經學受於呂文節公。史學經濟之學受於韓果靖公。小學受於劉儼石觀察。古文學受於從舅朱伯韓觀察琦。回籍應試。道經湘鄂。乘小車行。後督湖廣、閱荊州萬城隍工。至安陸隄上、指點村落、謂此當日經行地也。在晉州度歲。從父越山先生官晉州訓導。留住署中。越山先生名鉞。古田公兄廷雲之子。道光乙酉拔貢。」

道光二十年庚戌公十四歲

入南皮縣學。兄弟四人同應試。按公三兄皆入縣學。惟不詳何年。爲學政程侍郎（廷桂）所器。回晉州。六月。洪秀全起金田。贈公募義勇。謹斥堠。擒其黨闖入南盤江者。餘黨數千人皆宵遁。贈公上書勸撫請用李化龍八道進兵之策。不果行。」

咸豐元年辛亥公十五歲

咸豐二年壬子公十六歲

回籍應順天鄉試。中式第一名舉人。報至貴州、胡文忠在黃平軍中。與贈公書云、得令郎領解之信、與南溪開口而笑者累日。南溪、韓果靖公也。是科主試者。尙書滿洲文端公麟魁。蕭山朱文端公鳳標。旌德呂文節公賢基。文節家世傳經。公質疑請益。所學益進。留京。寓外家蔣氏。

咸豐二年癸丑公十七歲

二月。江寧不守。畿輔戒嚴。七月。出都。值霖雨兼旬。自通州乘舟至東鹿。賦詩紀行。所爲詩入集自是年始。八月。弟小潭卒於貴州。公兄弟六人。長之灝、字遠瀾。次之清、字仲穆。之淵、字蓉江。次即公。又次之澄、字小潭。之涌、字閏濤。姊妹八人。長適劉拔貢肇均。次未詳。三適鹿文端公傳霖。四適

慶雲崔銘傳。五適南皮黑龍村劉書瀛。七字許氏、未嫁而婿卒、守貞以終。六八皆幼孀。」□月。抵貴州。省贈公於興義。〔贈公出入險阻四年。吳文節公（文銘）督雲貴。贈公上團練方略萬言。文節大奇之、署紙尾曰。東南事一以委君。旋以他人事詿吏議。文節與巡撫再疏復公官。權貴西道。雲南回部反地濱貴西道轄。出私錢募壯士出境會戰東川城下。馳謁大府陳方略。用其策、東川平。〕

咸豐四年甲寅公十八歲

遵義教匪楊鳳倡亂。連陷安南、普安、進攻興義。贈公悉力固守。設方略擊敗之。公兄弟及姊婿鹿文端公皆登陴。〔時郡兵調發略盡。贈公鳩士民率僚屬固守。自以身當北門賊衝。趣家人登樓厝薪。曰。城陷。卽自焚。苦戰三晝夜不息。賊縱火攻門。城垂破。贈公陰縱死士下城繞出賊後。賊驚擾。贈公猝出城。令曰。願擊賊者從。出城三十里。次於普坪。民爭趨赴。數日內衆至三萬。下令寬脅從。散去不問。殺賊自歸者賞。鄉團助戰者蠲本年租。於是附賊者皆解體。一戰破賊。擒其魁冉秉成等。斬之。凡十二日。境內悉平。〕是年石夫人來歸。〔嘉慶癸酉拔貢都勻知府潯州石煦女〕。

咸豐五年乙卯公十九歲

侍贈公於軍中。贈公破楊鳳於花江。苗民反。龍里貴定邪教起。贈公權貴西道、破走之。遣公北歸。〔石夫人偕行〕。自瀘州渡江入蜀。〔雨中行棧道。與伯仲叔三兄相遇。〕除夕。宿紫柏山留侯祠。〔念去年此日身在圍城。愴然有作。〕是年女檀生。

咸豐六年丙辰公二十歲

三月。赴禮部試。考取覺羅官學教習。七月。贈公卒於貴陽。〔苗匪之起也。贈公已病。以官民固請。強

起視師。既破賊、再權貴東道。而巡撫撓其權。所部餉又不時給。盡質衣物以哺軍。久之得餉。以次攻克茶山。湘子峒。甕朗。落賊巢。雨。濕薰蒸。病益劇。請解兵柄。許之。七月二十四日。卒。後七日。邵勻城陷。代理都勻知府石均原任都勻知府鹿壯節。公丕宗。暨夫人蕭氏皆殉難。石公、石夫人之兄。鹿公、文端父也。」

咸豐七年丁巳公二十一歲

兄仲穆先生奉贈公之喪歸南皮。□月。卜葬於雙廟之阡。劉夫人蔣夫人朱夫人皆合祔。

咸豐八年戊午公二十二歲

十月。服除。

咸豐九年己未公二十三歲

二月。將赴會試。族兄文達公（之萬）爲同考官。循例迴避。（文達與公同出三世祖嫡後）。在籍辦清平團練。（凡二十餘村。有團練規約。）□月。入都。（仲穆先生在籍辦團練事）。

咸豐十年庚申公二十四歲

三月。恩科會試。文達公爲同考官。仍迴避不赴。出都。以詩別陸眉生給諫。（名秉樞。桐鄉人。公會代給諫草奏。荷旨獎問。故詩有馬周慚媿負常何之句。）六月。子權生。（原名仁權。公以二十字紋子孫輩行。曰、仁厚遵家法。忠良報國恩。通經爲世用。明道守儒珍。）八月。英法兵陷京師。文宗顯皇帝北狩。公感憤時事。有海水詩。□月。至濟南。入巡撫文達公文煜幕府。

咸豐十一年辛酉公二十五歲

三月。歸南皮。(因濟南卑濕患腳氣故)。留數日。赴任邱。爲獻縣劉仙石先生教其仲子。(先生名書年。公姊婿伯洵拔貢之父。官貴陽知府。著有經說一卷。刻入功順堂叢書。)同邑季藝堂太史薦公於欽差大臣勝保。卻之。(藝堂名崇文。咸豐庚申進士。官右庶子。公致藝堂書云。到此日後。與伯洵閉戶讀書。研究古今王伯得失之要。此心稍有寧靜氣象。又云。旅進旅退於戟門之下。將焉用之。致一無用少年。而使足下有過舉之名。弟不爲也。南皮縣志言藝堂才器過人、其讀經史而外、凡天文、地理、兵書、壬遁以及各國語言文字、無不窮究。與公最友善。)

同治元年壬戌公二十六歲

正月。入都。三月。應會試。挑取謄錄第三名。(同考官范鶴生先生得卷頭薦之。額溢被擯。范先生、名鳴蘇。武昌縣人。時官內閣中書。翁文恭日記。見范鶴生處一卷。二場沈博絕麗。三場繁徵博引。其文真史漢之遺。余決爲張香濤。卷在鄭小山處。竟未獲雋。令人扼腕。鶴生爲之竟夕永歎。欲以本房他卷往易。爲監臨所阻。)五月。赴河南。七月。入毛文達公(昶熙)幕府。(文達以副憲在籍奉旨督辦團練、幫辦剿匪事。陸眉生給諫居母喪。文達奏請派赴河南、襄辦軍務。給諫與公有通家之好。遂約偕行。五月二十五日。行抵歸德營次。七月。給諫卒於軍。家貧不能歸葬。公經紀其喪。事畢欲行。文達固留、延致幕府。八月。至開封。先是張勤果公曜以布政使統軍剿賊豫南。欲致公於幕下。公屬從子桐辭謝。)九月。族兄文達公按事河南。十一月。署理河南巡撫。毛文達公出省督師。公入巡撫署。爲文達草疏言事。疏入。兩宮皇太后勳容嘉歎。(國史張之萬傳。之萬署河南巡撫。甫視事。疏請釐定折漕。有旨嘉其直陳漕弊。不避嫌怨。飭部施行。按公所具草。蓋卽此疏。)上書韓果靖公。陳贈公積勞病故狀。(贈公之卒、總督某有懷於平時、不以勞勩上聞。至是果靖爲貴州巡撫。公上書曰。咸豐乙卯秋冬之間。貴州畔苗蠭起。都勻麻哈貴定以下諸郡縣、咸被攻圍。警報狎至。巡撫蔣君強起先君子於家、使率師辦賊。先君子以在興義城守。勞瘁成疾。固

辭不獲。扶病視事。當是時。賊去省會數十里。新募之軍才萬五千人。自出省門。步步荆棘。轉戰而前。身在行間者二百餘日。大小數十百戰。殺賊萬計。一定清水江之亂。一擒賊渠楊崇妹。兩解貴定之圍。至於蒙犯霜露。絕甘分少。自同將校。有少壯之所不能堪者。度支懸罄。不時給饌。自質服御百物以給軍實。以次安輯流亡。鳩集團練。爲我殺賊。不用官錢。至丙辰七月。迭覆賊巢。遂達都勻城下。徒以當路掣肘。搯扼怵鬱。發憤歔血。而且日夜坐臥一帳。寒暑蒸濕。勞苦過差。遂成沈痼。此當日三軍之所共見。士民之所周知。故總督某。怒其方正。誣以無功。罷歸省城。其時病已危篤。至省八日而卒。此而謂之沒於王事。夫復何疑。而總督行其己私不以入告。於是先君子拳拳憂國之苦心。冒死百戰之成勞。闐然而就澌滅矣。是年七月。巡撫以先君子題補貴東道。有旨令總督查明覆奏。於是飾詞上聞。更以他人題補。其覆奏有云。節節退守。始退至龍頭營。又退至舊縣。而且年近七旬等語。時先君子年止六十四耳。夫由貴定退割龍頭營。乃巡撫恐賊從他道入犯。飛檄調還。令駐其地。以扼省城門戶。非擅退也。若謂又退至舊縣。則更妄矣。龍頭營去省六十里。舊縣去省百餘里。誰不知之。在先君子賁志以終。補闕與否。何足損益。惟血戰效命以死。而反蒙敗北畏葸之聲。如此沉寃。其孰甘之。伏惟吾師託志忠雅。勇於爲義。倘蒙博采輿論。以疏上聞。請照軍營病故例賜卹。俾地下之靈。藉以不朽。則之洞兄弟等沒齒糜頂。豈敢忘德。昧死呼籲。惟吾師可否之。」

同治二年癸亥公二十七歲

韓果靖公以贈公死事狀上聞。奉旨追贈太僕寺卿銜。蔭子之涌以州判候選。□月。入都。三月。會試。四月初九日。榜發。中式第一百四十一名貢士。〔仍出范鶴生先生門下。先生喜而賦詩。有再到居然爲此人。之句。公以詩謝。是科主試者。河內李文清公棠階。大興沈文定公桂芬。襄陽單文恪公懋謙。滿洲文恪公載齡。〕十四日。正大光明殿覆試。列一等第一名。二十一日。廷試。〔對策指陳時政。不襲故常。閱卷大

臣皆不悅、議置三甲末、文靖公寶璽亟賞之。〕閱卷大臣置二甲第一。試卷進呈。兩宮皇太后拔置一甲第三。二十四日。臚唱。賜進士及第。二十五日。謝恩。二十八日。朝考。列一等第二名。五月初八日。引見。授職翰林院編修。〔自應小考鄉會試至殿廷諸試、不攜片紙隻字。所刊鄉會試硃卷殿試朝考卷。不改易一字。〕四月。爲劉芝泉侍御〔其年〕草疏。劾御史吳台壽申救勝保朋黨撓法、飾詞挾制、并劾其兄吳台朗夤緣招搖狀。〔疏曰、竊臣見御史吳台壽申救勝保一摺、披閱未竟、駭然以驚、憤填胸臆。不意方今朝廷清明之世、臺諫中竟有毫無廉恥、毫無忌憚之小人如吳台壽者也。伏思勝保一員、現經廷臣雜治。其罪狀之虛實、聽之研鞠諸臣。或殺或宥、聽之宸斷。非微臣所敢與知。若如該御史所奏之狂悖誣罔、則竊有不敢已於言者。其間顛倒是非、妄造黑白、不足深論。其牽引先帝、妄議聖德、造作虛聲、恐喝誕妄不經之言。冀以熒惑宸聰、間執人口、可謂不遺餘力矣。夫朋黨之弊。唐宋明以來、歷代有之。撓亂國政。攻訐異己。權貴爲之包容、臺諫聽其嗾使、貽禍國家、至深且烈。獨至我朝、事一秉乾斷、此弊廓清。乃該御史首犯不韙。公然〔此下原文有脫字〕黨魁。此風一開、朝局將不可問。區區之愚、是用大懼。敢將該御史原摺悖謬之處、爲我皇上敬陳之。該御史云。文宗顯皇帝崇上廟號詔旨。以豐縣之捷稱武功首。若謂此不足以爲功。是將以誣勝保者誣先帝等語。夫豐縣之役、其視僧格林沁殄滅連鎮馮官屯。胡林翼肅清湖北全省。曾國藩肅清江西全省。爲功孰多易知也。特以奏績在先。故敘次居首。況國家命將出師、豈得執一勝之功。遽爲鐵券。此次勝保之案、糾劾出自諸臣。而逮問出自皇上。若如該御史斥言者以誣先帝之罪。縱不爲言者地。獨不爲皇上地乎。其悖謬一。該御史又云。恪遵諭旨。按律科罪。所謂陷君不義、有累聖德等語。給事中趙樹吉雖有參劾勝保之疏。朝廷並無即行正法之旨。該御史待定讞失平而後疏論、未爲晚也。何以汲汲中救、惟恐不及。其爲阿私死黨、彰明較著矣。而況憑空臆斷。竟以不義累德等語、指斥乘輿。其悖謬二。該御史又云。明亮阿桂等獲咎逮問。旋復起用、等語。無論勝保之材略器望。非阿桂等之比。卽阿桂等之獲咎、豈嘗驕恣欺罔、跋扈貪劣、有如勝保乎。國家刑憲、自有權宜。其赦宥者、非情有可原、卽功浮於過者